

## Mona kaims

Mona kaimē Lokuošatiu,  
Katrās īr netuolēi Šatiu,  
Plīnūs laukūs, ba truopnē kelē  
Stuoviejē brungi vaikīstēs truobelē.

Pri budinku auga žuolēs,  
Žemē vēituoms – grīns muolis.  
Kēimē – šolēnē so svērtē  
Ēr keparnē par vasara vērtē.

I muokīkla ejau par pēivas –  
Pagriuoviūs kvepiejē ēivas.  
Šatiu bažnīcē ēš tuola švēitē –  
I mēšēs ēr i atlaidus kvēitē.

Traukē būrēs kaima žmuonis  
Prašītē Pondēiva maluonēs,  
Ka būto svēkē, mitrē ē dēktē,  
Ka nakti ramē galietom ožmēgtē.

Laikā keities ē geriejē,  
Žmuonis mondresnē būtē nuoriejē.  
Jaunē i miestus patraukē,  
Ēr kaims smarkē sosētraukē:

Nogriova budinkā, ožžielē takā,  
Ēšmērē tievā, pasena vakā.  
Bovusiu trēbu nebgal berastē,  
Kas kamē gīvena, sunkē soprastē.